

# LA HISTORIO DI JEMIMA FLAK-ANDADO



da  
Beatrix Potter

Unesme publisita 1908


Ica tradukuro

Creative Commons 2023 by Brian E. Drake  
Attribution-NonCommercial-ShareAlike 4.0 Unported  
International

The Oxford Rationalist  
56 Albany Street  
Oxford, NY 13830 USA  
(607) 843-2636  
[brian.eric.drake@gmail.com](mailto:brian.eric.drake@gmail.com)

# **La Historio di Jemima Flak-anado**

da  
Beatrix Potter



tradukita da  
Brian E. Drake




QUANTE drola vidar kovyunaro de  
anadyuni kun hanino!

—Askoltez la historio di Jemima Flak-  
anado, qua iritesis pro ke la spozino di la  
farmisto ne permissis ke el kovez sua  
propra ovi.



**E**LUA bofratino, siroino Rebeka Flak-  
anado, tote volis ke altru kovez  
—“Me ne havas sat pacienteso por sidar  
sur nesto dum duadek-e-ok dii; anke nek  
tu, Jemima. Tu lasus ke oli koldeskez; tu  
savas ke to es vera!”

“Me volas kovar mea propria ovi; me  
ipsa kovos oli,” kroasis Jemima Flak-  
anado.





EL ESFORCIS celar sua ovi; ma oli  
sempre trovesis e forportesis.

Jemima Flak-anado tre desesperis. El  
rezolvis konstruktar nesto for la farmeyo.



DUM bela posdimezo printempala el  
iris alonge la vetur-voyo qua  
duktas trans la kolino.

El weris shalo e kofio.



A TINGINTE la kolmo di la kolino, el  
vidis foresto distanta.

El opinionis ke ol semblas esar sekura  
e tranquila loko.



JEMIMA Flak-anado ne multe kustumis  
flugar. El kuris kelka metri advale,  
brandisante la shalo, e lore el saltis aden la  
aero.





EL BELEGE flugis pos sucesoze bone  
komencar.

El glitis jus super la supraji di la arbori  
til ke el vidis aperta loko meze di la  
foresto, ube la arbori e busharo esabis  
fortranchita.



JEMIMA decensis kelke negracioze, ed anadatre marcheskis por serchar nestifo-loko konvenanta e sika. El kelke prizis arboro-stumpo inter alta digitali.

Ma—sidante sur la stumpo, el tresayis trovar elegante vestizita jentilulo qua lektas jurnalono.

Il havis nigra stacanta oreli e sablea labio-pili.

"Quak?" dicis Jemima Flak-anado, la kapo e la kofio inklinante ye l'una latero.  
—"Quak?"



**L**A JENTILULO levis sua okuli  
ladsuper la bordo di la jurnalno e  
kurioze regardis Jemima—

“Siorino, ka vu perdis vua voyo?” il  
diciis. Il havis kaudo longa e tufatra sur  
qua il sidis, pro ke la stumpo esis kelke  
humida.

Jemima opinionis ke il esas tre jentila e  
bela. El explikis ke el ne perdabis la voyo,  
ma esforcas trovar nestifo-loko  
konvenanta e sika.



**H**A! KA YES? nu!” dicis la jentilulo havanta sablea labio-pili, ed il kurioze regardis Jemima. Il faldis la jurnalono, e pozis ol aden la posho di sua basko.

Jemima plendis pri la superflua hanino.

“Advere! Quante interesanta! Me dezirus renkontrar ta pultro. Me docis lu ke lu atencez sua propra aferi!”





**M**A PRI nesto—nula desfaciles:  
me havas sakedo de plumi en  
mea ligno-hangaro. No, mea kara siorino,  
tu ne jenos irgu. Tu darfas sidar ibe tam  
longe kam tu deziros,” dicis la jentilulo  
havanta kaudo longa e tufatra.

Il duktis el a tre izolata, desgaye  
aspektanta domo inter la digitali.

Ol konstruktesis ek vergo-faski e torfo,  
e kom kameno esis du ruptita siteli, l’una  
adsur l’altra.




**Y**<sup>EN</sup> MEA somero-rezideyo; vu ne  
opinionus ke mea kaverneto—mea  
vintro-domo—tante konvenas,” dicis la  
gastigema jentilulo.

Dop la domo esis kaduka hangaro,  
konstruktita ek anciena saponobuxi. La  
jentilulo apertis la pordo ed enduktis  
Jemima.



**L**a hangaro esis preske tote plena de plumi—ol esis preske sufokanta, ma komfortoza e tre mola.

Jemima Flak-anado kelke surprizesis trovar tante vasta quanto de plumi. Ma ol esis tre komfortoza; ed el nestifis tote sen penar.



**K**ANDE el ekvenis, la jentilulo havanta sablea labio-pili sidis sur lenio e lektis jurnalono—adminime il desfaldabis ol, ma il regardis super la supraĵo de ol.

Il esis tante jentila ke il semblis preske regretar lasar ke Jemima irez adhome por la nokto. Il promisis multe sorgar elua nesto til ke el morgo rivenos.

Il dicis ke il amas ovi ed anadyuni; il esos fiero vidar bona nesto en sua ligno-hangaro.





JEMIMA Flak-anado venis omnaposdimeze; el depozis non ovi en la nesto. Oli esis verde blanka e tre granda. La ruzoza jentilulo multe admiris oli. Il inversigis oli e kontis oli kande Jemima absentesis.

Tandem Jemima dicis ad il ke el intencas koveskar morgo—“e me adportos sako de frumento kun me, por ke me nultempe bezonos livar mea nesto til ke l’ovi apertos. Li forsan koldeskos,” dicis la konciencoza Jemima.



**S**IORINO, me pregas ke vu ne jenez vu per sako; me provizos aveni. Ma ante ke vu komencos vua tedanta kovo, me intencas ofrar regalo a vu. Ni havez festino nur por ni ipsa!

“Ka me darfas demandar ke vu adportez ula herbi de la farm-gardeno por facar saporoza omleto? Salvio e timiano, e minto e du onyoni, e petroselo. Me provizos saimo por la fars —saimo por l’omleto,” dicis la gastigema jentilulo havanta sablea labio-pili.



JEMIMA Flak-anado esis stulto: ne mem  
la menciono pri salvio ed onyoni  
suspektigis el.

El iris tra la farm-gardeno, formordis  
peceti di omna la diversa sorti di herbi  
uzata por la farso di rostita anado.



**E**D EL ocilante marchis aden la  
koqueyo, e prenis du onyoni de  
korbo.

La skota muton-hundo Kep  
renkontris el ekvenanta. “Quon tu facas  
per ta onyoni? Adube tu sole iras  
omnaposdimeze, Jemima Flak-anado?”

Jemima kelke veneracis la muton-  
hundo; el dicis ad il la tota historio.

La muton-hundo askoltis, sua saja  
kapo inklinata; il ridetis kande el  
deskriptis la polita jentilulo havanta  
sablea labio-pili.





**I**L PLURAFUYE questionis pri la foresto, e pri la exakta situo di la domo e la hangaro.

Pose il ekiris, e trotis a la vilajo. Il serchis du fox-hundyuni promenanta kun la buchisto.



JEMIMA Flak-anado iris alonge la vetur-  
voyo lastafoye dum sunoza posdimezo.  
El esis charjata per amasi de herbi e du  
onyoni en sako.

El flugis super la foresto, e decensis  
avan la domo di la jentilulo havanta  
kaudo longa e tufatra.



**I**L SIDIS sur lenio; il sniflis la aero, e sempre destranquile regardetis la cirkondanta foresto. Kande Jemima decensis il tresayis.

“Venez aden la domo tam balde kam vu regardabis vua ovi. Donez a me la herbi por l’omleto. Rapide!”

Il esis kelke abrupta. Jemima Flakanado nultempe audabis ke il tale parolis.

El esis surprizata, e destranquilla.



DUM ke el esis en la hangaro, el  
audis batetanta pedi dop ol. Ulu  
havanta nigra nazo sniflis ye la fundo di la  
pordo, e pose riglo-klozis ol.

Jemima pavoreskis.





UN INSTANTO plu tarde venis la  
maxim terorinda bruiso —  
aboyado, grunado, ed ululado, kriachado  
e jemado.

E pos to on nultempe vidis ta foxatre  
jentilulo labio-pilizita.

Balde Kep apertis la pordo di la  
hangaro, e liberigis Jemima Flak-anado.




**D**ESFORTUNOZE, la hundyuni  
enhastis e manjis omna ovi ante ke  
il povis haltigar li.

Il havis mordo-marko sur la orelo ed  
amba hundyuni klaudikis.



J<sup>EMIMA</sup> Flak-anado duktesis adheme  
plorante pro ta ovi.



**E**L DEPOZIS plusa ovi dum junio, ed  
el permisesis ipse kovar oli: ma nur  
quar de la anadyuni ekiris la ovi.

Jemima Flak-anado dicis ke to esis pro  
elua nervi; ma el sempre esis mala  
kovanto.

FINO